

Prome Minister Evelyn Wever-Croes hayando un mihor bista di situacion di SERLIMAR, cu no ta nada alentador



DIARANSON 20 di juli tabata un dia hopi extenso pa loke ta trata e reunionnan cu stakeholders en cuadro cu formacion di Gabinete Wever-Croes II. Riba e tereno di medio ambiente, Roland Croes di Serlimar tabata presente na unda cu a papia riba e compania mes, pasobra manera cu ta conoci Serlimar ta den surseance van betaling.

El a wordo poni bou un tipo di curatela financiero aña pasa na mei dor di e Minister anterior di Medio Ambiente.

Tabata importante pa sa con ta para awor cu Serlimar, pasobra no lo kier mira un compania estatal bay bancarota. E reunion cu Serlimar a duna un mihor bista di e situacion di e compania.

Prome Minister Evelyn Wever-Croes a duna di conoce cu e situacion ta keda hopi critico sinembargo den e ultimo lunanan aki Serlimar a logra mira avansenan si den e tema financiero y organisatorio, pero no ta sigur cu esaki ta suficiente ainda pa por scapa e compania di bati bancarota.

“E reunion cu Serlimar tabata riba e area laboral, comercio, salud y medio ambiente. E meta na final di dia ta pa nos scucha kico ta locual ta importante p’e organisacionnan aki pa nos tene cuenta cu ne den e acuerdo di gobernacion cu nos ta trahando riba dje.

Manera mi a splica diabierna, e acuerdo di gobernacion t’e prome stap, e di dos stap ta pa reparti e ministerionan entre RAIZ cu MEP y despues nos ta bay n’e di tres stap pa apunta Ministernan p’e diferente carteranan y cuminsa e procedura di screening.

Serlimar ta un compania cu hopi reto, haciendo su maximo esfuerso pa rescata e compania. Presente tabata Director interino sra. Lacle, bewindvoerder sr. Rep y miembro di hunta di supervision sr. Roland Croes.

Di banda di formacion di Gabinete Wever-Croes II tabata presente Glenbert F Croes, Carlos Guiamo, Ursell Arends, Geoffrey Wever, Endy Croes, Rocco Tjon, Hendrik Tevreden y Formador Evelyn Wever-Croes.